

HUNNE BASEL

Fasnacht 2013



Dr Gaischt vom Hans Lux Yseli

Vor ere glaine Eewigkait
Het sich z'Basel e Gschicht zuedrait;
E Mär vo Lieb' und faltschem Schwuur,
Vo Lydeschaft und Gspett und Druur.

Unsere Maa, es isch e Gwaal
Isch fridlig, sensibel und emotional.
Drum wogt äär's au nit an s'wyyblig Gschlächt
Het äär allewyy! Angscht, äär miech nyt rächt.

Aaber – un jour – de Voorbehalt zem Drotz
„Dated“ äär mool s'Anna Lotz.
Syy Juugedliebi isch die Daame,
Vom Hans Lux Yseli, so syy Namme.

Aagloo vor Langerzyt uff Madamm,
Gstoot äär iire gar nit glamm,
Si seig syy userweelti Frau,
Syyini Gfyy! wääre ächt, si gspyyri's doch au!

Im Schnooggeloch hoggt unser Hansdampf,
Wie isch syy Wäärbe e druurig Grampf,
Isch syyini Holdi doch per se
Scho an e andere Dyp vergää.

„Hesch gheert, das isch jo allerhand!
Dä Hans, dä isch am Änd e Schand!“
Glyysel und Gspett iiber syyini Gwaal
Kulminiere im „Fuuryyr de Bäle“

Das isch zvyyl, dä gränggend Loon,
Zersteert dä die seelisch Konschtitution,
So dass dä aarm Dropf ganz resigniert
Und elainig nyt mee regischtriert.

Suscht hätt äär velicht mitbekoo,
Dass iire Schatz d'Frau Lotz het hängge loo.
Und worum ächt? Goot's am Änd no schlimmer:
Wäg'eme andere Frauezimmer.

Doch all das erliggt dr Hans scho nimm,
Syy gaischtig Verfassig isch scho z'schlimm.
Mit brochnem Häärz isch äär aim begäägnet
Und het scho glyy emol s'Zytligi gsäägnet.

Aaber gwäälti Seele verleen is nit glyy
Und dyysele-n-is als Schatte hindedryy.
Das het au s'Anna sproochlos gmacht,
Bsuecht dr Hans si jetz viermool znacht.

Phanisch, jo binoochem duureknallt,
Suecht Madamm bi dr Kiirche Halt.
Si pflänt zem Heer, äär meeg dr Hans entlaschte,
Und lueg aa, dä Deal, dä isch im Kaschte.

Am Näschtänd gseet si nimm syy Fratze,
Heert im Dungle nyt mee gratze,
Vo jetz aa – und das isch d'Ironie -
Isch d'Anna elainig und unglügglig gsi.

Blogti Seele git's no hitt,
Und eb si's schaffe, das zeigt d'Zyt.
Um dr Hollande mien mer glaub nit bange,
Syy Lyysi het „Lover“, aaber hebt em d'Stange.

Au bikannti Gaischter sinn nit immer gwäält,
Zeigt dr Harry syy Willi gärn dr Pressewält;
Und dr Williäm und syyini „Chatte Royale“
Gniesse iire „French Blüttelskandal“.

S'Angela danzt mit em Samaras Sirtaki,
Dr Obama schmuust d'Michelle in Kentucky,
Dr Regisseur Sanders isch au kai Trischte,
Hüpft är doch schnäll mit em Snow White in d'Kischte.

Drum gilt au in dr hittige Zyt,
Es goot nit ooni, aaber au nit mit.
Denn jedes Beeri bruucht syy Seggel,
Und jede Dopf schliesst mit eme Deggel.

Und so erstuunt's is wirklich nit,
Ass es faggtsch weeniger Schaidige git.
Miir finde's guet und fraie-n-is draa,
Wemme d'Liebi im Lääbe gniesse kaa.

Numme ains isch klar, ych mach e Wett,
Lysch im Alter emool elainig im Bett,
Denn gratzt's und kyycht's, gsesch e Gaischterfraztel
Zem Gligg! Nur Di Schatz leggt sich uff d'Madratze.

Sujet:

Dr Gaischt vom Hans Lux Yseli

Dr Vordraab:

Reitigi Jumpfere

S'Requisit:

Yggspeerti Liebi

Dr Major:

E Gaischterjeeger gjaagt vo Gaischter

S'Spiti:

Gwäälti Seele par excellence